

de qui in Italia. Sguizari, né la ultima dieta fata a Zurich, non haveano fato reverentia al Christianissimo re, perchè li oratori cesarei haveano usato molte parole contrariando a la volontà dil dito Re. Expetavano de li oratori dil re Catolico e dil re di Anglia; tegnirano chi li farà miglior partito.

Avendo scripto dil cardenal Adriano, è da saper dito cardenal è stato in questa terra poi seguì il caso suo in caxa di domino Giacomo da ca' da Pexaro episcopo di Baffo; ma essendo intimato a venir a Roma, non li parse, per dubito dil Papa, et è fama partisse e non voler dir dove l'andasse; *tamen* si tien sia scoso in casa.

*Di Franza, fo etiam letere di l' Orator nostro, di 28, di Angers.* Come aspectavano lo agente cesareo, et aveano inteso era in camino, partito da la Cesarea Majestà con la sua resolution.

In questo zorno, poi disnar, in Quarantia criminal, compite di parlar sier Zuan Antonio Venier avvocato di sier Piero Antonio Morexini retento, et vien menato per li Avogadori extraordinarii, e fo posto la parte di proceder per li 3 Avogadori et sier Marco Foscarei *olim* Avogador in dita materia. Et fo il primo Consejo: ave 4 di no, 7 di la parte et 25 non sincere, et nulla fu preso. Doman parlerà sier Marco Foscarei predito: e cussì parloe la matina e compite.

Fo serito ozi, per li Cai di X, in tutte terre di Dalmatia, come, havendo inteso che per quei monasteri sono molti guardiani di l' ordine di San Francesco di nation bossinese et corvali, et atento dil 1473 et 1474 fusse posto parte nel Consejo di X, che niun non fusse venitian o subdito nostro potesse aver alcun officio in diti monasteri, pertanto doveseno li rectori obedir le parte, e trovando esserne, li debbi mandar via, e sia capi di nostri subditi.

320 *A di 9 Lujo.* La matina, in Quarantia criminal, per il caxo di sier Piero Antonio Morexini fo podestà e capitano a Bassan, retento, parloe sier Marco Foscarei censor *olim* Avogador extraordinario in questo caxo, e compite, e poi disnar la Quarantia non se reduse.

Da poi disnar, fo Consejo di X con Zonta. E tra le altre cose, elexeno li 3 justa la parte presa di andar a meter i confini dil venitian zerca Corezuola per le possession tien i frati di San Zorzi Mazor: i quali fono sier Francesco Donado el cavalier fo savio a Terra ferma, qu. sier Alvise, sier Vetur Michiel fo capitano a Bergamo, qu. sier Michiel, sier Francesco da ca' da Pexaro fo savio a Terra ferma, qu. sier Marco.

Fu posto far monede in Zeca da soldi 16 l' una et da soldi 8 l' una, et balotà 3 volte, a la fin fu presa.

*A di 10.* La matina, nulla fu di novo. Io mi parti di questa terra per andar a Sanguanedo in veronese con sier Marco Antonio Venier mio nepote, et steti fuora zorni 21.

Da poi disnar, fo Pregadi, et leto tra le altre queste letere.

*Di Franza, di Angers, di l' Orator nostro, di 2 Lujo.* Di le noze di monsignor di Lutrech in la fia di monsignor di Roval; et zerca il nontio cesareo, come l'era zonto li con amplia comission de la Cesarea Majestà etc.

*Da Milan, di Zuan Giacomo Caroldo secretario nostro, da Pavia, di 7.* Avisa di le presente noze di monsignor di Lutrech, el qual dia andar in Franza.

*Di Verona, di sier Alvise Contarini podestà et sier Daniel Renier capitano, di 7 et 8.* Con relation dil Colateral zerca le cosse di l' Imperador e di Trento, sicome in le dite relation apar, notade di soto.

*Di Spagna, di sier Francesco Corner orator, di 12, 25 et 28 Zugno, date a Saragosa.* Come erano stà electi 6 rectori a veder se li populi pol jurar fedeltà al Catolico re *vivente matre.* *Item,* che l' Re ha di la decima di l' oro si traze di la mina ducati 52 mila a l' anno, e per le . . . 200. *Item,* il Cattolico re era partito con li soi intimi, e andato per questi caldi a certo loco.

Fu posto, per li Consieri, Cai di XL e Savii dil Consejo e di Terraferma: atento le letere di rectori di Verona scriveno il danno fa il merchè *alias* concesso per il Colegio, per autorità dil Consejo di Pregadi a di 12 Zugno dil 1517 a quelli de l' xola de la Scala di poter far mercato li: sia dita concession revocada in *omnibus* come si mai non fusse stata, *ut in parte.* Et a l' incontro, sier Piero Capello el consier, messe indusiar fin sia fato intender a quelli de l' xola di la Scala, aziò possino venir a usar de le sue raxon. Andò le parte: dil Capello consier 53, di altri Consieri, Cai e Savi 94, di no 1, non sinceri 5 et fu presa la revocation.

Fu posto, per li Consieri, Cai di XL e Savii prediti, certa provision a una Juliana e sua fia Tadia di Foresti ducati cinque per paga in vita loro a la camera di Verona, a raxon di page 8 a l' anno, atento 320 sono stà private di l' ostaria di Caldiero a le qual fu concessa per anni 12: fu presa.

Fu posto, per li Consieri: atento sier Piero Ba-